

## 每週經課朗誦經文(巴克禮漢羅/教羅)2012/08/12

### 共同經課 - 1

#### 撒母耳記下十八章五節~九節、十五節、三十一節~三十三節

5 王命令約押、A-pí-su、Í-thài，講，Lín 帶 tiòh 我，款待 hit-ê 少年人押沙龍 tiòh khah 寬。王爲 tiòh 押沙龍命令 hiah-ê 首領 ê 話，百姓 lóng 有聽見。6 百姓就出去田野抵敵以色列人，tī Í-hoat-liân ê 樹林交戰。7 Tī-hia 以色列人 thài 輸 tī 大衛 hiah-ê 奴僕 ê 面前；hit 日陣亡 ê 真 choē，共有兩萬人。8 因爲戰陣線真開，遍遍 tī hit 所在；樹林所吞滅 ê，比 hō 刀所吞滅 ê khah-choē。9 押沙龍偶然 tú-tiòh 大衛 ê 奴僕。押沙龍 khiā 伊 ê 騾(lò)，騾走 tùi 大叢橡樹 âm ê 樹枝下經過，伊 ê 頭殼 kùi-tiòh 橡樹，吊 tī 半空中；所騎 ê 騾做伊去。15 Kā 約押 kiáh ke-si ê 少年人十個，圍押沙龍 phah hō 伊死。31 Kó-sī 人也到；Kó-sī 人講，有消息報 hō 我 ê 主我 ê 王；耶和華今 á 日對一切興起攻擊你 ê 人 kā 你報仇。32 王 kā Kó-sī 人講，少年人押沙龍平安無？Kó-sī 人應講，願我 ê 主我 ê 王 ê 對敵，kap 一切興起攻擊你，beh 害你 ê 人，lóng 親像 hit-ê 少年人一樣。33 王就不止傷心，上城門頂 ê 樓啼哭，ná 行 ná 講，我 ê kiáⁿ 押沙龍 ah，我 ê kiáⁿ，我 ê kiáⁿ，押沙龍 ah；我恨 boē 替你死，押沙龍 ah，我 ê kiáⁿ，我 ê kiáⁿ。

### 共同經課 - 2

#### 詩篇一百三十篇

1 上崎 á ê 詩。1) 耶和華 ah，我 tùi 深淵求叫你，2 主 ah，求你聽我 ê 聲；願你 àⁿ 耳孔聽我懇求 ê 聲。3 主耶和華 ah，你若究勘罪惡，Chī-chhui khiā-oē-tiâu？4 總是你有赦免 ê 恩，Beh hō 人敬畏你。5 我 thèng 候耶和華，我 ê 心神 teh thèng 候；Tī 伊 ê 話我有 òng 望。6 我 ê 心神 thèng 候主，比守更 ê 人 thèng 候天光 khah 切，比守更 ê 人 thèng 候天光 khah 切。7 以色列 ah，你 tiòh òng 望耶和華；因爲 tī 耶和華有慈愛，Tī 伊有豐盛 ê 救贖。8 伊的確救贖以色列，脫離伊一切 ê 罪惡。

### 共同經課 - 3

#### 以弗所書四章二十五節~五章二節

25 所以 tiòh 除去白賊，tāk 人 kap 伊 ê 厝邊講真實，因爲咱相仝做體。26 Lín 受氣，tiòh m̄-thang 犯罪；有激受氣，m̄-thang 到日落，27 也 m̄-thang hō 魔鬼有縫 thang 入。28 偷 thèh ê 莫得 koh 偷 thèh，寧可 tiòh 磨，親手做好 ê 工，chiah 有 thang 分 hō 欠缺 ê 人。29 Lín ê 嘴 lóng m̄-thang 講出 lâ-sâm ê 話，獨獨 tiòh 講好話，照及時 ê 欠缺來造就伊，hō 聽 ê 人得 tiòh 恩典。30 也莫得 hō 上帝 ê 聖神憂悶，就是所 bat 用來蓋印 lín，到 tī 贖回 ê 日 ê。31 一切 ê 苦毒、怨恨、受氣、喧嚷、謾謗，以及一切 ê 惡毒，lóng tiòh tùi lín 中間除去。32 Koh tiòh 用仁慈相款待，存憐憫 ê 心；大家相赦免，親像上帝 tī 基督 bat 赦免 lín 一樣。1 Lín 既然做上帝所疼 ê kiáⁿ，tiòh 學上帝。2 也 tiòh 行 tī 仁愛，親像基督 bat 疼 lín，替咱獻家己做禮物做祭祀，芳芳 tī 上帝 ê 面前。

### 共同經課 - 4

#### 約翰福音六章三十五節、四十一節~五十一節

35 耶穌 kā in 講，我就是活命 ê 餅；就近我 ê 人決斷 boē iau，信我 ê 人永永 boē 嘴乾。41 猶太人因爲耶穌講，我是 tùi 天降落 ê 餅，就 ngáu-h ngáu-h 念伊，講，42 Chit-ê kiám m̄ 是約瑟 ê kiáⁿ 耶穌 mah？伊 ê 父母是咱所 bat ê。Taⁿ 怎樣講，我是 tùi 天降落 ah？43 耶穌應講，Lín 莫得 án-ni ngáu-h ngáu-h 念。44 若 m̄ 是差我 ê 父引 chhoā 伊，就無人會就近我；就近我 ê，我 tī 末日 beh hō 伊 koh 活。45 Tī chiah-ê 先知有記載講，Iⁿ lóng beh hō 上帝教 in。見若 tùi 父聽見來學 ê 人，就就近我。46 這 m̄ 是講有人 bat 看見父，只有 tùi 上帝來 ê，伊 bat 看見父。47 我實實 kā lín 講，信 ê 人有永活。48 我是活命 ê 餅。49 Lín ê 祖 tī 曠野食 má-ná，in 亦死。50 Chit-ê 就是 tùi 天降落 ê 餅，hō 人食 ê，也 boē 死。51 我是活命 ê 餅，tùt 天降落 ê；人若食 chit-ê 餅，就活到永世代；koh 我所 beh hō 人 ê 餅，就是我 ê 肉爲 tiòh 世間 ê 活命 chiah 賞賜 ê。